

## Karaloukta nütüma

# SANTIAGO

---

**1** <sup>1</sup>Tayakai Santiago, wane suwala'ata tanülia Jacobo. Taya chi nüchepchiakai Maleiwa otta chi Senyotkai Jesucristo. Tashajüin joolu'u jümüin jiakana anoujashiikana nünain Cristo walakatakana sainküin mmakat süpüshua sa'akajee tü poloosükot piammüin e'irukuu, na nuu'uliwo'ukana Israel.

### Jamüinjatü wakuaiippa su'unnaa tü müliaa we'rüinjatkat

<sup>2</sup>Tawalayuwaa, müleka ji'rüle müliaa sütümajee kasa wainma, anakaja müleka talatüle jaa'in su'unnaa tia. <sup>3</sup>Antüsü tü müliaakat jünainmüin süptüla jütüjaanüinjanain aa'u sütüma wayuu sünnain lotüin jia sünnain anoujaa nünain Jesucristo. Müleka jülatirüle tia müliaakat sünnain jüchecherüin jaa'in sünnain anoujaa, katsüinjeerü ma'i jaa'in süchikijee. <sup>4</sup>Je müleka katsüinre jaa'in, nnojoleena jia jo'uweein aa'in sünnain anoujaa. Laülaweerü jaa'in.

<sup>5</sup>Je müleka eere ja'aka eekai che'ojaain nümüin kekiinjachin nia wanaa sümaa süntüin tü müliaakat nünainmüin, anakaja müleka nüchuntüle nümüin Maleiwa soo'opünaa tia. Naapeerü nümüin, nnojoleerü na'alijirüin shia nuulia,

süka naapeein ma'i shia. Nnojoleechi niyoujain nia sünnainjee achuntaa.

<sup>6</sup>Otta wanaa sümaa nüchuntüin, anakaja nünoujale süka süptüshua naa'in sünnain naapeerüin Maleiwa nünüiki je sünnain naapeerüin nümüin tü nüchuntakat aa'u. Müleka matsüinre naa'in sünnain anoujaa wanaa sümaa nüchuntüin, meechi aka nia saa'in sukuaippa süshi palaa sünnain nnojolüin jimatüin.

<sup>7-8</sup>Mayaasüje saapüneerüin nümüin nütüma Maleiwa tü nüchuntakat, saa'in nümüin, nnojoleerü aapünüin nümüin süka keiwa'alain naa'in chi wayuukai je süka jo'uweein naa'in sünnain süpüshua tü naa'inrakat.

<sup>9</sup>Je wane juwala eekai mojuin, anakaja müleka talatüle naa'in süka nüpüshin nia Maleiwa. <sup>10-11</sup>Aka'aya chi juwala eekai washirüin, anakaja müleka talatüle naa'in süka nia'innya wane nüpüshin chi Maleiwakai. Otta nnojoiishi nüpüshin sünnainjee tü nuwashirüinkat, shia sünnainjee tü nünoulakat. Anakaja müleka nnojorule motüin naa'in chi washitkai sünnain saja'lajaweerüin tü nuwashirüinkat so'uweena wane ka'i. Maa aka sujutuuin süsii wunu'u ja'ipa ka'i, akaweeria tü nuwashirüinkat sünnain saja'lajaain maalü.

<sup>12</sup>Tamüshii paala jia tachikua: Chi eekai nülätirüün tü müliaakat sümaa nüchecherüün naa'in, alana'aleejeechia sünnain talataa aa'in. Je chi Maleiwakai, nuwalaajeечи nia süka pansaain nüüüiki paala sünnain naapeerüün wane kataa o'u namüün napüshua na eekai alin apüla nia.

<sup>13</sup>Chi wayuu eekai naa'inreein kasa mojusü, nnojotsü anain müleka "Nia Maleiwa kaainjalaka atüma taya" nüümüle. Watüjaa aa'uchi chi Maleiwakai sünnain nnojolin kaainjaleein je sünnain nnojolüün naa'inrireein wayuu kasa mojusü. <sup>14</sup>¿Kasa kaainjaleeka atüma wane wayuu? Kaainjaleeshi nia süka noonoon sümaa tü kasa mojusü kee'ireekat naa'in. <sup>15</sup>Müleka naa'inrüle tü mojusukat kee'ireekat naa'in, kaainjalaa tia. Je müleka nnojoiere nuu'ulaa'in suulia kaainjalaa, oukteechi nia.

<sup>16</sup>Tawalayuwaa, jia aishiikana tapüla, nnojo jünoujain tü alawaakat sünnain kaainjaleein jia nütüma Maleiwa jaajüün. <sup>17</sup>Süka jamüün, anasü süpüshua tü nüsilajakat chi Maleiwa kakumalakai tü kasa warattuuikat chakat iipünaa. Je müichia nnojolüün aapüün nia wamüün kasa mojusü süka matüjüün a'wanajawaa nukuaippa. <sup>18</sup>Je aneekünüshii waya nütüma süpüla shii'iranajaainjatüün waa'in sütüma tü shiimüün nüchikikat chi O'tte'erüikai süpüla ni'iyatüünjachin wanainjee sünnain anashaatain ma'i süpüshua tü nukumalakat.

**Tü akuaippaa talatakat  
atüma naa'in Maleiwa**

<sup>19</sup>Tawalayuwaa, jia aishiikana tapüla, jülüja jaa'in tü taküjünjatkat

jümüün joolu'u: Anakaja müleka eere jaa'in sünnain tü nükjüjakat wane juwala jümüün sümaa nnojolüün jüsouktüün pejeewa sünnainmüün tü nümakat. Nnojo jaashichijaa'in nüümüün. <sup>20</sup>Chi eekai jashichin nüümüün chi nuwalakai, iseerü nüchiki aa'inraa tü kasa anasü nüchekakat chi Maleiwakai nüpüleerua. <sup>21</sup>Juu'ulaa jümata suulia jaa'inrüün tü yarüttakat atüma jaa'in je suulia jaa'inrüün kasa mojusü, maa aka tü saa'inrakat wayuu sainküün mmakat süpüshua. Shia anaka alu'u müleka joonoole sümaa tü pütchi nüüükikat chi Maleiwakai ni'itaakat sulu'u jaa'in, tü aa'inmajakat jia suulia kaainjalaa.

<sup>22</sup>Joonoo jümata sümaa nüüüiki Maleiwa sünnain jaa'inrüün süpüshua tü sümakat. Nnojo müün aka jia naa'in chi eekai talatüün naa'in saa'u aapajüün ne'e nüüüiki sünnain nnojolin naa'inrüün tü suluwataakat anain. <sup>23-24</sup>Chia wayuukai moonoolosai, müshi aka naa'in eekai ni'raain nu'upünaa paala süka rouya sünnain motüün naa'in shia süchikijee. <sup>25</sup>Otta chi eekai jülüjüün naa'in nüüüiki Maleiwa süpüla naa'inrüünjatüün waneepia tü suluwataakat anain, sümaa nnojolüün motüün naa'in shia, alana'aleejeeria ma'i sünnain talatüün naa'in sünnain süpüshua tü naa'inrakat, süka shiain nüüüiki Maleiwa taashika atüma wayuu suulia kaainjalaa.

<sup>26</sup>Wane wayuu eekai talatüün Maleiwa nümaa naajüün, müleka nnojorule nülaüle'erüün naa'in süka nüüüiki, mayaashije nu'waataain sulu'u tü nünoulakat, nnojotsü kasain saamüün nüümüün tia no'ulu'u Maleiwa. <sup>27</sup>¿Kasa talataka atüma

naa'in chi Washikai Maleiwa?  
Talatüsü naa'in müleka waa'inmajüle  
na wayuukana eekai mapüshin,  
maa aka na tepichi moo'utshiikana  
oo'ulaka na jieyuu oukta  
a'wayuusechiikana. Je nücheküin  
chi Maleiwakai nnojorule waa'inrüin  
tü yarüttakat atüma waa'in, maa aka  
tü naa'inrakat na wayuu manoujain  
saliikana.

**Achiajaanüshii waya suulia  
kachekala'ataliin wayuu**

**2** <sup>1</sup>Tawalayuwaa, jia  
anoujashiikana nüinain  
chi Wasenyotsekai Jesucristo  
chi anashaataakai ma'i, anakaja  
müleka nnojoliire jia kachekalain  
su'utku wayuu. <sup>2</sup>¿Jameena jia  
müleka nantüle piamashii wayuu  
jünainmüin sulu'u tü outkajaaleekat?  
Chi wane, anashaatasü ma'i nüshe'in  
je sittiija süinain najapü oorole'eya  
ne'e. Oo'ulaka chi wane, mojusü  
nüshe'in süka mojuin nia. <sup>3</sup>Müleka  
kachekalain jaa'in nüümüin chi  
ana ashe'inchikai süinain jümüin  
nüümüin: “Püikkalaa saa'u tü einasee  
anasükat”, wanaa sümaa jümüin  
nüümüin chi moju ashe'inchikai  
süinain “Sha'wata ne'e pia yala'aya”  
je süinain “Püikkalaa mmalu'u”,  
süinain jümüin nüümüin, ¿kasa  
mojuka süinain tia? <sup>4</sup>Shiümüin  
süinain kachekalain jia su'utku  
wayuu. Ja'itaichi kapülain jaa'in  
antaa ja'akamüin chi mojushikai,  
nnojoiishi jamajachiyaain ne'e nia  
jümüin.

<sup>5</sup>Jaapa tanüiki tawalayuwaa,  
jia aishiikana tapüla. Wainma na  
wayuu mojushiikana so'ulu'u wayuu.  
Otta katsüinsü naa'in süinain anoujaa  
sükajee aneekuushin naya nütüma  
Maleiwa süpüla aluwatawaa wanaa

nümaa so'uweena wane ka'i. Shia  
tü nükjüjakat achiki paala Maleiwa  
süinain pansaain nüntüiki noo'opünaa  
na wayuu eekai alin apüla nia. <sup>6</sup>Otta  
jiakana, müleka kachekarale jia  
su'utku wayuu, e'rülüi wayümüin  
jia namüin eekai mojuin sükajee  
tia. Na washinnuu kojutkana  
jütüma, nayayaain e'ike'erüin jia  
maa'ulu yaa, nayayaain o'unirüin jia  
namülatu'ümüin na laülaayukana  
süpüla saapünüinjatüin jikii natüma,  
<sup>7</sup>nayayaain na mojukana anüiki  
nüümüin Cristo, chi kojutkai jütüma,  
chi aneekakai jia süpüla nüpüshin.

<sup>8</sup>Soto jaa'in tü ashajünakat  
paala sulu'u tü nüchikimaajatkat  
chi Maleiwakai, tü nükjüjapü'ükat  
Cristo sümüin wayuu süinain  
müin mayaa: “Anashii aire jüpüla  
wayuu süpüshua maa aka alin  
jia jüpülajiraa”. Müleka joonoole  
sümaa tü pütchikat, anasü ma'i  
tü jaa'inrakat. <sup>9</sup>Alu'ujasa müleka  
kachekarale jia su'utku wayuu,  
shiümüin süinain jiain kaainjaraliin  
sükajee tia. Je kasalajaneerü jümüin  
tia süka moonooloin jia sümaa tü  
ashajuushikat.

<sup>10</sup>Wane eekai oonooiin sümaa  
tü nuluwataakat anain Maleiwa,  
kaainjalaichipa'aya nia ja'itairü  
wwatuain ne'e tü naainjalakat.  
<sup>11</sup>Soto jaa'in tü nuluwataakat anain  
süinain nüümüin wümüin: “Nnojo  
püma'üjaain sümaa wayuu nnojotkat  
pu'wayuusein otta nnojoiikai  
pu'wayuusein”, je “Nnojo pu'utüin  
saa'in wayuu”, makat. Ja'itairü  
nnojoliin püma'üjaain sümaa  
wayuu nnojotkat pu'wayuusein  
otta nnojoiikai pu'wayuusein,  
müleka pu'utüle saa'in wayuu,  
kaainjalaichipa'aya ne'e pia nu'upala  
Maleiwa sükajee tia.

<sup>12</sup>Jülüjja jaa'in tü jaa'inrakat je süpüshua tü jümakat, süka jütüjaain saa'u sünnain asouktinneenain jia ni'ipajee Maleiwa so'uweena wane ka'i soo'opünaa tü jaa'inrapü'ukat, müleka joonole sümaa tü nuluwataakat anain Cristo süpüla aijiraain jia jüpüla. Je soto jaa'in sünnain taashiinapain jia sütüma tü nümapü'ukat Jesús süpüla ji'yataainjanain nüümüin Maleiwa süka süpüshua jaa'in. <sup>13</sup>Müleka mamüliajüünre jia saa'in wayuu, nnojoleena amüliajüünüin jia nütümaya. Akaajasa na amüliajülüikana saa'in wayuu, talateerü naa'in so'u ka'ikat tia nu'upala Maleiwa.

**E'nnajatü nünnoula wane wayuu  
sünnainjee tü naa'inrakat**

<sup>14</sup>Tawalayuwa, ÷jameechi chi wayuu eekai nüümüin: “Anoujashi taya nünnain Cristo”, sünnain nnojolüün naa'inrüün tü kasa anasü nüchekakat chi Maleiwakai nüpüleerua? ÷O'te'enneechi sünnainjee tia jaajüün? <sup>15</sup>÷Jameerü eera nukuaippa chira wayuukai nüümüin wane nuwala eekai che'ojaain nüshe'in, eekai che'ojaain eküülü nüümüin? <sup>16</sup>Müleka nüümüle nüümüin: “Eeshi Maleiwakai pümaa, kashe'injeechi pia, emireechi pia”, sünnain nnojolüün nüsulajayaa'in tü kasa che'ojaakat nüümüin, nnojotsü jaloulin nüümüin chi mojushikai tü nümakat nüümüin. <sup>17</sup>Mayaasüje müün nüntüiki chi anoujashikai naajüün sünnain “Anoujashi taya nünnain Cristo” nüümüin, nnojotsü kasain anain apüla tü nünnoulakat nu'upala Maleiwa, süka nnojolüün naa'inrüün tü kasa anasü nüchekakat chi Maleiwakai nüpüleerua.

<sup>18</sup>Eeshiija'a süpüla jümüün tamüün: “Eeshii wawalayuu eekai ne'nnajünüün sünnainjee tü kasa anasü naa'inrakat, otta wane e'nnajünüshii ne'e sünnainjee na'waataain sulu'u tü nanoulakat”.

Tamüshii paala jia: Süka nnojoliin te'rüün jia sünnain aa'inraa tü kasa anasü nüchekakat Maleiwa jüpüleerua, nnojotsü tatüjaain aa'u müleka shiimüünre sünnain jünoujain nünnain Cristo. Otta tayakai, jütüjaa aa'uchi taya sünnain shiimüün tanoujain nünnain, süka ji'rüün tü kasa anasü naa'inrakat.

<sup>19</sup>Anoujashii jia sünnain waneeshin chi Maleiwakai. Shiimüün sünnain waneeshin nia. Otta müsia tü yolujaakalüürua, nanouja anainrü tia'aya, je mmothshii naya neema Maleiwaya. ÷O'te'enneena na yolujaakana sünnainjee tia jaajüün?

<sup>20-21</sup>Maa'inyüü tü jülüjakat jaa'in. Taküjeerü joolu'u jümüün nüchiki Abraham chi watuushikai süpüla jiyaawatüünjatüün saa'u sünnain nnojolüün kasain anain apüla tü sünnoulakat wane wayuu nu'upala Maleiwa müleka nnojorule saa'inrüün tü kasa anasü nüchekakat chi Maleiwakai süpüleerua. ÷Kasa anajiraaka anainjee Abraham nümaa Maleiwa? Shia süka naapüün Isaac chi nüchonkai nüümüin süpüla nu'utajachin naa'in saa'u tü a'ajüleekat. <sup>22</sup>Yapashi nia süpüla nu'utüünjachin naa'in chi nüchonkai. Süka jamüün, shiimüün sünnain nünnoujain nünnain Maleiwa. Je nütüjaaichipa aa'u Maleiwa sünnain shiimüün nünnoujain sükajee tü naa'inrakat. <sup>23</sup>Ekerajüsü nütüma Abraham tü ashajuushikat paala sulu'u tü nüchikimaajatkat chi Maleiwakai: “Nücheka achikit

Maleiwa anajiraain Abraham nümaa sünainjee nünoujain nünüiki”, müsü. Je süka shiimüin sünain nünoujain Abraham, aleewashi chi Maleiwakai nümaa. <sup>24</sup>Jiyaawata aa'ulu joolu'u tü tamakat jümüin. Watüjaa aa'ulu müleka anajiraale nümaa Maleiwa wane wayuu sünainjee tü kasa anasü naa'inrakat, nnojotsü sünainjeejatüin ne'e tü nümakat sünain “Anoujashi taya” sünain nümüin.

<sup>25</sup>Soto jaa'in süchiki Rahab tü wayuu maa'insatkat paala sümaiwa sünain anajiraain shia nümaa Maleiwa sünainjee tü kasa anasü saa'inrakat. Kamaneesü shia namüin na judío ajayajüshiikana sünain suunjülüin naya noulia na na'ünüükana sümaa shi'itain naya sulu'u wane wopu wane sümüin. <sup>26</sup>Maa aka wane ouktüsü, watüjaa aa'ulu sünain nnojolüin katüin so'u süka nnojolüin sükutulaain sünain aa'inraa wane kasa. Akaajaa chi wayuu nnojotkai kasain anain apüla tü nünoulakat nu'upala Maleiwa, watüjaa aa'ulu sünain manoujain nia süka nnojolüin naa'inrüin tü kasa anasü nüchekakat chi Maleiwakai nüpüleerua.

#### Achiajaanüshii waya suulia mojuin wanüiki sümüin wayuu

**3** <sup>1</sup>Tawalayuwaa, jia kee'ireekana aa'in ekirajaa wayuu, soto jaa'in wane kasa: Waya ekirajülüikana, saashajaajeena waya wayuu müleka mojushiire tü wamakatsümüin. <sup>2</sup>Nnojotsü wayuu eekai aa'inrüin tü anasükat waneepia, ¿aashi müin? Otta chi wayuu eekai nnojolin kaainjalain süka nünüiki, wayuu anashi ma'i nia. Laülaa aa'inchi nia saa'u

süpüshua'aya tü naa'inrakat sükajee tia.

<sup>3</sup>Müleka we'itaale wane juleena nünain wane ama we'ejena, jüüjüüshi wamüin eepünaale wacheküin waralin nia. <sup>4</sup>Je wane anuaya su'unnaa wane jouktai, ja'itairü miyo'uin tü anuakat, apalaitaasü süka wane ojununtia jo'uuchon nütüma chi süpü'üyakai. <sup>5</sup>Je tü wayeekat, mayaasüje jo'uuchoin shia wanain, watta ma'i saalin tü kasa ojuittakat waanükülü'ujee sütüma. Maa aka wane siko'u sünain jotüin alama wappünaa sütüma, <sup>6</sup>akaajaa tü wayeekat sünain kaainjalain waya sütüma. Nücheküin Satanás süpüleerua kaainjalainjanain waya waneepia süka wanüiki süpüla yarüttünjatüin waa'in sütüma tü wamakats.

<sup>7</sup>Jülüja jaa'in tü kasa kepiakat wuna'ainküin, tü wuchiikalüirua, tü wüikalüirua, je tü jimekalüirua. Ja'itairü simaluunain süpüshua, eesü eekai sümaüsijünüin sütüma wayuu.

<sup>8</sup>Otta tü wayeekat, matüjainsat amaüsijünaa. Kaainjaleeshii waya süka waneepia. Je na wayuu waküjakana amüin wane pütchi mojulu'ut, eewaajeerü tü nakuaippakat sütüma, maa aka ouktüin wayuu sütüma weneena.

<sup>9</sup>Wayakana na a'waajakana Maleiwa, müleka wo'ulejüle wane wayuu, wo'ulejüin Maleiwa wanaa nümaa, süka aainjuushin nia nütüma Maleiwa. <sup>10</sup>Waapüin analu'ut nümüin chi Maleiwakai so'u wane ka'i je wo'ulejüin wayuu so'u wane'eya. Tawalayuwaa, shiimü'innya sünain mojuin tü waa'inrakat sükajee tia. <sup>11-12</sup>Jülüja jaa'in wane jasalira. ¿Eweetüsü

wiin palaasü sümaa wiin jemetüsü sulu'ujee? Nnojo. Otta wane wunu'u kanüliasü “higuera” münüin, ðkachonsü “aceituna”? Nnojo. Otta müsia wane “vid”, ðkachonsü “higo”? Nnojo. Tawalayuwaa, müsia aka tü waanükukat müleka sujuittirataarüle pütchi analu'ut sümaa wane pütchi moju'ut.

**Nukuaippa chi eekai kekiin  
nütüma chi Maleiwakai**

<sup>13</sup>Chi wayuu eekai kekiin ja'aka süka nütüjaain saa'u tü anasükat süpüla naa'inrüinjatüin sümüin wayuu, kamaneeshi nia sümüin sünaain nnojolüin pülayaain naa'in suulia. <sup>14</sup>Otta müleka kanainre jaa'in na juwalayuukana sümaa jüchunjain aa'in saa'u nakorolo, je müleka kee'ireere jaa'in a'waajünaa waneepia sütüma wayuu, nnojo ju'waataain sulu'u kekiin jia, je nnojo ju'waataain sünaain jütüjaain saa'u tü shiimüinkat jaajüin. <sup>15</sup>Shiimüin sünaain jülüjüin jaa'in tü jülüjakat naa'in na manoujainsaliikana je jaa'inreein tü naa'inrakat. Chi ekirajakai jia sünaain tia, nnojoiishi niain Maleiwa chakai iipünaa, nia kekirajanainka jia chi Yolujaakai. <sup>16</sup>Müleka nnojorule juu'ulaain suulia achunjaa aa'in je suulia kee'ireein jaa'in a'waajünaa, nnojoleena jia paa'inwain sünaain a'yatawaa nümüin Maleiwa sütüma tia, je aa'inreena jia kasa mojusü waneepia.

<sup>17</sup>¿Jameerü nukuaippa chi eekai kekiin nütüma chi Maleiwakai chakai iipünaa? Wuleerü naa'in. Nnojoleechi a'ülüjiraain namaa na nuwalayuukana, anamieechi nia namüin, jüüjüjeechi nia namüin. Amüliajeechi nia waneepia na eekai

ni'rüin sünaain müliaa. Naa'inreerü kasa anasü sümüin wayuu süpüshua. Nnojoleechi kachekala'atalin nia wayuu. Je nnojoleechi piamaain o'upünaa. <sup>18</sup>Chi wayuu ja'aka eekai nükaaliijain na nuwalayuukana süpüla aijiraainjanain napülaajiraa, nükaaliijain naya süpüla naa'inrüinjatüin waneepia kasa anasü.

**Achiajaanüshii waya suulia  
ashataa nakuaippa**

*na manoujainsaliikana*

**4** <sup>1</sup>¿Jamüshii jia jü'ülüjaajiraaka'a? Shia süka kee'ireein jaa'in tü jüchekakat jümüiwa. <sup>2</sup>Je müleka nnojorule juuntüin tü kee'ireekat jaa'in, a'ürülaajiraasü jaa'in je o'uniraweeshii jia jaa'in. Atkaajiraashii jia süka kachiiruain jaa'in tü nama'anakat na juwalayuukana. Otta tü nüsülajeekat chi Maleiwakai, nnojotsü aapünüin jümüin süka nnojolüin shia juchuntüin nümüin. <sup>3</sup>Otta mayaasüje juchuntüin nümüin, nnojoleerü aapünüin jümüin, süka nnojolüin anain jukuaippa namüin na juwalayuukana. Juchuntüin tü jüchekalakak ne'e jaa'in jümüiwa.

<sup>4</sup>Jia wayuu nnojoliikana ichein nünain Maleiwa, jalia jia. Müleka kee'ireere jaa'in tü kasa mojusü naa'inrakat na manoujainsaliikana, atüjaaneena aa'u jia sünaain kanain jaa'in Maleiwa je sünaain niaichipain joo jü'ünüüin. <sup>5</sup>Nnojo motüin jaa'in tü ashajuushikat sulu'u tü nüchikimaajatkat Maleiwa: Ni'itaa'in chi Naa'inkai sulu'u waa'in süka nücheküin tü aleewaakat wamaa. Je chi Naa'inkai Maleiwa, nücheküin

süpüleerua icheinjanain waya waneepia nünain. <sup>6</sup>Shiimüin sünain nükaaliijüin waya suulia kee'ireejüin waa'in kasa mojusü. Shia tü ashajünakat achiki sulu'u tü nüchikimaajatkat Maleiwa sünain müin mayaa:

“Chi wayuu eekai pülain naa'in nuulia Maleiwa,  
nnojoleechi akaaliijünüin nütüma.

Nia akaaliijünaka nütüma  
chi eekai jüüjüün nümüin”.

<sup>7</sup>Sükajee tüü, anakaja jüüjüüle jia nümüin Maleiwa waneepia. Müleka jüleejüle chi Yolujaakai, o'unamaateechi juulia. <sup>8</sup>Je müleka jürütkaale nünainmüin Maleiwa, arütkaajeechi nia jünainmüin. Jia kaainjaraliikana, juu'ulaa suulia jaainjala. Jia piamakana o'upünaa, juu'ulaa suulia yarüttaa aa'in. <sup>9</sup>Jia talatakana aa'in wanaa sümaa jaa'inrüin tü kasa mojusükot, anakaja joolu'u müleka mojule ma'i jaa'in saaliijee tia. <sup>10</sup>Shiimüin sünain kojuteenain jia nütüma Maleiwa müleka jüüjüüle jia nümüin.

<sup>11</sup>Tawalayuwaa, juu'ulaa suulia mojuu anüiki namüin na juwalayuukana. Müleka jiyoujüle tü naa'inrakat chi juwalakai je süsalain nia jütüma, jiyoujainja'a mmata tü nuluwataakat anain Maleiwa sükajee tia. Shiimünja'a nnojolüin jikeraajüin shia. <sup>12</sup>Nnojoliishii e'itaanüin jia süpüla jiyoujainjachin chi juwalakai. Nia ne'e nümüiwa Maleiwa aa'inrüinjaika tia. Maleiwa, chi aapakai nünüiki wamüin süpüla woonowaa amaa, nia kapülainka süpüla o'tte'eraa waya anoujashiikana, je kapülainshi süpüla süsalainjatüin nütüma saainjala tü manoujainsatkalüürua.

### Achiajaanüshii waya suulia a'waatawaa

#### *sulu'u tü waa'inrüinjatkat*

<sup>13</sup>Jalia jia suulia a'waatawaa sulu'u tü jaa'inrüinjatkat mapeena jaashin, sünain müin mayaa: “O'uneena joo waya mapeena sulu'ümüin wane pueulo süpüla a'yatawaa maa aka wane juya, sünain oikkawaa wane kasa shii'iree washirüü”. <sup>14</sup>Tamüshii paala jia: Nnojotsü jütüjaain aa'u tü alatajateetkat jümüin mapeena. Maa aka tü mannuuyakat watta'a maalü sünain kerashiin tü alamakat sütüma je soosojooin ja'ipa ka'i, akaajaa wayakana, palit ka'i sünain katüin wo'u, je oukteena waya mapeena. <sup>15-16</sup>Mojusü ju'waataain sulu'u jukuaippa. Shia anaka alu'u müleka jümüle: “Tü waa'inreekat, wounteerü waa'inrüin shia müleka nücheküle chi Maleiwakai wapüleerua. Müleka nnojorule nücheküin wapüleerua shia, aneerü waa'in sümaa tia”. <sup>17</sup>Tashajüitpa joo jümüin tü pütchikat süpüla joonooinjatüin sümaa. Je joolu'u, süka jütüjaain saa'u tü kasa anakat süpüla jaa'inrüin, müleka nnojorule jaa'inrüin shia, kaainjaleena jia sükajee tia.

### Achiajaanüshii wayuu washinnuu suulia ji'iyee

**5** <sup>1</sup>Jiakana washinnuukana, jaapa jumaala tü taküjüinjatkat joolu'u jümüin. Anakaja ju'ttüle sünain mojushaatain jaa'in saaliijee tü müliaa ji'reetkat mapeena. <sup>2</sup>Nnojoleerü kasain saamüin jümüin tü juwashirüinkat so'uweena wane ka'i. Tü jüshe'in anashaatakat,

rulumairü maa'ulu. <sup>3</sup> Je tü oorokat oo'ulaka tü pülaatak, o'ttüitpa sünain ittüin. Shii'iree washireein ma'i jia, nnojotsü jükaaliijain wayuu eekai müliain. Je saa'ujee tia, süsaleena ma'i jia so'uweena tü ka'i saja'lajaainjatkat o'u kasa süpüshua. <sup>4</sup> Na wayuu a'yataapü'ükana jümüin, na nnojoliipü'ükana juwalaajüin, nnojoleerü motüin naa'in tia. Je chi Maleiwa Pülashikai, ni'rüin tü namülialakat je naapüin tü ne'irakat. <sup>5-6</sup> Shia jülüjaka jaa'in ne'e ayalajaa kasa kojutsü. Ji'yepü'üshii jia suulia wayuu, je aapapü'üshii jia shikii wayuu süpüla o'utünaa aa'in, ja'itaina maainjalapü'üin naya juulia, ja'itaina nnojoliin jü'ünüüin naya. Je nnojotsü jülüjayaain jaa'in sünain nüntajachin Cristo mapeena süpüla süsalainjanain jia nütüma.

#### Tü wakuaijpainjatkat su'unnaa müliaa

<sup>7</sup> Tawalayuwaa, anakaja jüchecherüle jaa'in su'unnaa tü müliaa ji'rakat süma'inru'u ja'atapajüin nüle'ejüin Cristo. Maa aka wane apünajüi sünain a'atapajaa sü'itüin tü juyakat je sünain nnojoliin süshapajaain naa'in süma'inru'u kachoin tü nu'ttiakat, <sup>8</sup> akaweenia jiakana sünain jüchecherüin jaa'in su'unnaa tü müliaa ji'rakat. Jüchechera jumata jaa'in sünain anoujaa süka sülü'ülüin tü ka'i nüle'ejüinjatkat o'u Cristo nüchikua. <sup>9</sup> Je tawalayuwaa, mayaashijee jia müliain, jalia jia suulia jaashaja'alaajayaain na juwalayuukana, süpüla nnojoliinjanain jüsouktüin nümüin Cristo saaliijee tia. Je soto jaa'in sünain nüntamaatajachin nüchikua.

<sup>10</sup> Tawalayuwaa, wanaa sümaa tü müliaa ji'rakat, soto jaa'in

nakuaijpa na nünüikimaajanakana chi Maleiwakai paala sümaiwa. Mayaainje ne'rapü'üin namüliain sünainjee aküjaa nünüiki Maleiwa, ayatshi'iyaa sünain aküjaa süka nachecherüin naa'in. <sup>11</sup> Watüjaa aa'uchi chi Maleiwakai sünain naa'inrüin wainma kasa anasü sümüin wayuu eekai süchecherüin saa'in su'unnaa sümüliala, maa aka nümüin chi watuushikai Job paala sümaiwa. Mayaashijee müliain ma'i nia, nüchecherüin naa'in. Je nümüliajüin nia Maleiwa wanaa sümaa tia.

<sup>12</sup> Tawalayuwaa, tamüshii paala jia: Suulia süsalajüin jia nütüma Maleiwa, nnojo jümüin: “Pansaasü ma'i tanüiki süka taküjain sulu'u nünülia chi Maleiwakai chakai iipünaa”, nnojo jümüin. Shia anaka alu'u lotüle jünüiki waneepia.

#### Achuntüinjana waya nümüin Maleiwa waa'ujiraa

<sup>13</sup> ¿Eeshi eekai müliain ja'aka? Anakaja nüchuntüle nümüin Maleiwa saa'u tia. Je chi eekai talatüin aa'in, anakaja müleka nii'irajüle sünain nu'waajüin Maleiwa. <sup>14</sup> Je chi eekai ayuulin, anakaja müleka neenajirüle na laülaashiikana sulu'u tü outkajaaleekat süpüla nachuntüin nümüin Maleiwa naa'u saa'u nünülia chi Senyotkai sümaa nashulerüin seita nünain. <sup>15</sup> Müleka nachuntüle, sünain kanoulain ma'i naa'in, aawalaajeechi nütüma Maleiwa chi ayuuishikai. Je müleka kaainjarale nia, alatinneerü tü naainjalakat nuulia nütüma. <sup>16</sup> Je sükajee tüü, anakaja müleka jüküjiraale süchiki tü jaainjalakat sümaa jüchuntiraain jaa'u nümüin Maleiwa.

Anainjanakalaka na eekana ayuulin ja'aka. Shiimüin sünain naapeerüin chi Maleiwakai nanüiki na wayuu anajiraakana nümaa, je nücheküin süpüleerua naa'inrüin tü anasü nachuntakat nümiin.

<sup>17</sup>Soto jaa'in nüchiki Elías nüniikimaajachikai Maleiwa paala sümaiwa sünain müin aka nia waa'in wayakana wapüshua. Nüchuntüin süka süpüshua naa'in nümiin Maleiwa süpüla nnojölünjatüin sü'itüin tü juyakat. Ma'itüinkalaka tü juyakat maa aka saa'in apünüin juya shiatapünaamüin.  
<sup>18</sup>Nüchuntakalaka süchikijee tia

süpüla sü'itüinjatüin süchikua. A'ita müsia shia süpüla ka'ttiainjatüin wayuu sainküin mmakat süpüshua.

<sup>19-20</sup>Tawalayuwaa, ¿jameechi jütüma wane juwala müleka niyouktüle tü shiimüinkat sümaa nuu'ulaain suulia tü nuluwataakat anain Cristo? Müleka júkaaliijüle nia süpüla niitaainjachin nüchikua sünain oonowaa sümaa, o'tte'enneechi nia suulia akatalawaa nuulia Maleiwa. Ja'itairü wainmain tü naainjalakat, alatinneerü shia nuulia süpüshua nütüma Maleiwa.

Shiairia ne'e tü tashajakat jümüin.